

KENYATAAN MEDIA SURUHANJAYA INTEGRITI AGENSI PENGUATKUASAAN (EAIC)

SASARAN CPI 25 TERATAS: UBAH NARATIF RASUAH, EAIC TEKANKAN TINDAKAN BERANI

**UNTUK SIARAN SEGERA
11 FEBRUARI 2026**

Suruhanjaya Integriti Agensi Penguatkuasaan (EAIC) menyambut baik perkembangan terbaru Corruption Perceptions Index (CPI) yang mencatatkan Malaysia pada skor 52 mata dan kedudukan ke-54 dunia. Bagi merealisasikan sasaran 25 negara teratas menjelang 2033, EAIC menegaskan **usaha reformasi perlu bermula dengan tindakan yang kredibel dan memberi impak nyata**, bukan sekadar keputusan atau persetujuan di peringkat dasar.

Selaku badan pengawasan integriti agensi penguatkuasaan, EAIC menyeru **persepsi umum terhadap rasuah perlu diubah untuk mencerminkan komitmen serius negara terhadap integriti**, selaras dengan sasaran peningkatan CPI. Persepsi dan naratif terhadap **rasuah dan salah laku harus dilihat sebagai rompakan terhadap negara, yang menuntut setiap penjawat awam bertindak segera dan berani untuk mencegah kesalahan berakar umbi**. Ini menuntut pihak berkuasa dan ketua jabatan untuk lebih terbuka dan sanggup mengambil tindakan yang mungkin tidak popular, termasuk melaksanakan syor tata tertib dan menyingkirkan pegawai yang korup, sebagai langkah tegas untuk menegaskan integriti dan akauntabiliti institusi.

EAIC juga menyahut baik penekanan Transparency International Malaysia mengenai keperincian reformasi institusi dan perundangan, termasuk **penubuhan Ombudsman Malaysia yang harus dirancang dan dilaksanakan dengan teliti tanpa sebarang kelompangan, berkesan serta memberi manfaat sebenar yang lebih tinggi berbanding agensi sedia ada**.

Selaku Ketua Peneraju Focus Group Penguatkuasaan di bawah Pasukan Petugas Khas CPI, EAIC akan terus melaksanakan usaha dan mekanisme bagi memperkukuh integriti dan akauntabiliti agensi penguatkuasaan. EAIC percaya bahawa melalui komitmen terhadap tindakan nyata dan tadbir urus yang teguh, Malaysia mampu mencapai kedudukan 25 teratas CPI dan meneguhkan keyakinan rakyat terhadap integriti negara.

#TAMAT#

**SURUHANJAYA INTEGRITI AGENSI PENGUATKUASAAN (EAIC)
PUTRAJAYA**